

SETEMBRO 2014

SEMANA DAHULUK
MORIS SIMPLES DUKE RIKU

Objektivu:

1. Atu Pre-Adolexentesira bele hatene oin sa, moris simples duke riku
2. Atu Pre-Adolexentesira bele Hadomi moris simples
3. Atu Pre-Adolexentesira bele Pratika mori simples
4.

Prosessu

Orasaun

Jogos: lomba hatais taru sasan. Hili ema nai 2 no fo ba sira sasan nebe prepara ona. Ba ema ida-idak fo sasan nebe lahanesan. Ex. Ba ema ida fo oklu, xapeo, telefon, sapatu, saya, payun, korente, brinku, baton ba pintaibun nsst. Ba ida seluk fali fo deit bulusa no saya, sapatu, olku, no payun. Oinsa halo; bolu sira ba hamriik iha oin no fo tempo 5 minutus atu sira hatais se mak hotu uluk. Animador/a observa didiak sira nia jestu sira durante sira hatais roupa. (Animador/a bele hili fali aktividade seluk konforme, naran katak iha relasaun ho topiku).

Analiza jogus liu husi perguntas!

1. Saida mak imi hare diferente entre kolega nain 2 nebe hatais taru
2. Husu sira nia hanoin kona ba iha sasan barak no sasan oituan ninia konsekuensia mak oinsa?
3.

HAFORSA AKTIVIDADE HO LEITURA HUSI BIBLIA Mrk, 10:17-22

Foinsa'e ida nebe riku

¹⁷Wainhira Nia atu la'o ona, ema ida halai hasouru Nia, tuku tur ba rai hodi husu Nia, "Mestre diak, Ha'u sei halo sa atu bele hetan moris rohan laek?"

¹⁸Jesus hatan ba nia, "Tan sa o dehan Ha'u diak? La iha ema diak; Maromak mesak mak diak. ¹⁹O hatene ukunfuan sira: keta oho, keta halo adulteriu, keta na'ok, keta foti lia bosok hasouru ema, keta lohi ema, hamtauk o nia aman no inan." ²⁰Nia hatan hodi dehan ba Nia, "Mestre, Ha'u moris tuir sira ne'e hotu houri kiik kedas." ²¹Jesus fihir nia di-diak, hadomi nia hodi dehan ba nia, "Buat ida deit mak o sei kuran: ba, fa'an o nia sasan tomak, fahe ba ema kiak sira no o sei hetan rikuso iha lalehan; hafoin, mai tuir Ha'u." ²²Nia neon sala tebes tan liafuan hirak ne'e; nia ba ho neon nakraik, basa nia iha rikuso barak.

PERGUNTAS

Katekese ba Pre-Edolexente

1. Evangeliu nebe ohin imi rona koalia kona ba se?
2. Tuir imi nia hanoin foinsa'e ne'e kontente ka triste depois de nia simu resposta husi Jesus?
3. Tamba sa foinsa'e ne'e triste?
4.

SUMARIO

Iha jogus nebe ohin ita hare husi kolega sira nebe hatais taru. Iha ida nebe sasan barak no ida fali nebe iha sasan pas deit/ necesario deit. Ida nebe iha barak tenke lori tempo atu hatais, tenke hanoin barak atu usa oin sa nsst. Inves ida fali hatais lalais no la lori, tempo tamba sasan iha pas deit nune'e nia sei la hanoin barak no la triste se wainhira tenke lalais. Husi jogu simples ida ne'e fo hanoin mos mai ita ida-idak nia moris karik dala ruma ita hakarak atu iha buat hotu? Maske ita nia familia karik moris simple maibé ita ejiji atu moris hanesan ema riku. Nune'e se ita nia familia karik la fo kedas ita sente triste, desanima, no karik to'o fo tan ita nia-an atu sai viktima ba ema seluk ninia oferta nebe bele lori ita ba perigo. Karik dala ruma ita nebe iha sasan barak tamba inan aman bele hetan buat barak maibé ita lahatene oinsa atu fahe ba ema seluk ka tamba iha sasan barak ita susar atu husik wanhira ita moras atu mate sente laran susar, nsst. Nune'e ita koko atu hanoin ba ita nia moris! Tenke riku mak diak ka moris simples mak diak. Hodi fo faktu liu tan ita bele konfronta ho evangelio nebe ohin ita rona kona ba FOINSA'E IDA NEBE RIKU.

²¹*Jesus fihir nia di-diak, hadomi nia hodi dehan ba nia, "Buat ida deit mak o sei kuran: ba, fa'an o nia sasan tomak, fahe ba ema kiak sira no o sei hetan rikuso iha lalehan; hafoin, mai tuir Ha'u."* ²²*Nia neon sala tebes tan liafuan hirak ne'e; nia ba ho neon nakraik, basa nia iha rikuso i barak.*

Ohin loron joven barak mak lakon sira nia vida moral nian, luta maka'as atu hetan sasan mundu ne'e nian nune'e la fo ona valor bo'ot ba sira nia fiar atu moris tuir promesa nebe simu ona iha batismo, la dun interese atu ba tuir selebrasaun eukaristia ka Santa Misa, la iha sensibilidade ba maluk sira nebe terus ka kiak iha sira nian oin nsst..... imi hatene atu bele too iha moris nebe simples mak, siguro (metin) no haksolok, ne'e dehan katak hahalok sira ne'e ka jestu sira ne'e nudar ita nia agrades ba Maromak, basa Maromak kria ita ema iha mundu atu moris ho buat nebe esensial no lori ita fila fali ba Nia liu husi dalan/ moris simples ne'e.

Final: Orasaun:

Proposito ruma mos bele depende ba animadores.

SETEMBRO 2014

SEMANA DARUAK SAI DAME NA'IN

Objektivu:

1. Atu Pre-Adolexentesira bele hatene oin sa sai dame nain.
2. Atu Pre-Adolexentesira bele Hadomi/ hakiak damen
3. Atu Pre-Adolexentesira bele hari damen iha sira nia komunidad
4.

Prosessu

Orasaun

Musika:

HALO HA'U INSTRUMENTU DAME NIAN

S-22

1. Halo ha'u instrumentu dame nian,
lori domin ba sira hirus malu,
lori ita nia perdua ba malu,
halo metin sira be lakon fiar.

*Ref. Oh Na'i, tulun ha'u atu buka, fo ha'u an ba ema hotu,
la'os atu hein leet deit, buka ba atu hanoin diak
atu hadomi ema hotu .*

2. Halo ha'u instrumentu dame nian,
lori esperansa ba ema susar,
lori naroman ba fatin nakukun,
lori ksolok ba sira be triste los.
3. Halo ha'u instrumento dame nian,
iha laran luak hetan perdua,
iha laran diak hetan duni buat hotu,
iha mate ha'u sei hetan moris los.

Analiza muzika liu husi perguntas!

1. Tuir imi nia hanoin sai instrument damen nian katak sa?
2. Wainhira no iha nebe mak ita bele hari damen?
3. Atu sai dame nain uluk knanain hahu husi nebe?
4.

HAFORSA AKTIVIDADE HO LEITURA HUSI BIBLIA: MT, 5:1-12

Liafuan ksolok sira nian.

¹Hare tiha ema lubun boot, Jesus sa'e ba foho ida. Wainhira Nia tur tiha, eskolante sira hakbesik ba Nia. ²Nia hahu hanorin sira hodi dehan: ³"Ksolok ba ema sira nebe kiak iha laran, basa reinu lalehan sira nian. ⁴Ksolok ba sira nebe tanis, basa sira sei hetan ksolok; ⁵ksolok ba sira nebe laran kmaus, basa sira sei simu rai nudar liman rohan. ⁶Ksolok ba sira nebe hamlaha no hamrook ba justisa, basa sira sei bosu. ⁷Ksolok ba sira nebe laran luak, basa sira sei hetan laran luak. ⁸Ksolok ba sira nebe laran mos, basa sira sei hare Maromak. ⁹**Ksolok ba sira nebe hari dame, basa ema sei hanaran sira Maromak oan.** ¹⁰Ksolok ba sira nebe ema fo terus tan buka justisa, basa reinu lalehan sira nian. ¹¹Ksolok ba imi wainhira, tamba Ha'u, ema hateten aat imi, duni imi no bobar lia bosok hasouru imi. ¹²Haksolok ba, foti neon ba, basa imi nia kolen boot liu iha lalehan; basa nune'e mos mak sira duni profeta sira nebe mai uluk liu imi."

PERGUNTAS

1. Evanjeliu nebe ohin imi rona koalia kona ba saida?
2. Indika to'ok pontu importante nebe imi rona husi Evenjeliu ne'e?
3. Tansa mak Jesus dehan ksolok ba sira ne'bé!
4.

SUMARIO

Iha ita nia formasaun ohin nian, liu husi musika nebe ita rona fo hanoin mai ita kona ba oinsa atu sai **INSTRUMENTO DAMEN NIAN**. Nebe husu ba Na'i atu tulun ita sai dame nain hodi lori DOMIN, PERDAUN, ESPERANÇA, KSOLOK, LARAN DIAK, no LARAN LUAK. Virtude sira ne'e hotu nebe ita hakarak atu halo ba ema seluk uluk knanain tenke hahu husi ita-an, katak ita mak tenke esperimenta uluk oinsa sa sai damen nain, domin nain, ksolok nain. Virtude sira n'e konfirma liu tan iha Evanjeliu oinsa Jesus ninia attitude hasoru ema. ¹Hare tiha ema lubun boot, Jesus sa'e ba foho ida. Wainhira Nia tur tiha, eskolante sira hakbesik ba Nia. Nia hahu hanorin sira hodi dehan: "Ksolok ba ema sira nebe kiak iha laran, basa reinu lalehan sira nian. **Ksolok ba sira nebe hari dame, basa ema sei hanaran sira Maromak oan.** Jesus hatudu hahalok hirak

SETEMBRO 2014

ne'e hotu, basa uluk knanain Nia mak Maromak Oan domin nain nian, ksolok Nain nian,.....nune'e liu husi ita nian formasaun ba ohin nian konvida ita atu moris tuir Jesus ninia hanorin no ninia ejemplo. Nune'e deit ita bele dehan katak ita mak joven ba futuro kredo no nasaun nian. No tebes se imi (ita) moris tuir virtude sira ne'e ita bele dehan katak ita hatudu ita nia domin no agradece ba Maromak ba grasa nebe Nia fo mai ita.

Final: Orasaun:

Proposito ruma mos bele depende ba animadores.

Kanta fali musika:

HALO HA'U INSTRUMENTU DAME NIAN

SEMANA DATOLUK SASIN SANTIDADE NIAN IHA HAHALOK

Objektivu:

1. Atu Pre-Adolexentesira hatene kona ba sasin Santidade nian mak oinsa.
2. Atu Pre-Adolexentesira Hadomi moris santidade
3. Atu Pre-Adolexentesira bele pratika hahalok sira santidade nian
4.

Prosesu

Orasaun

ILUSTRASAUN:

DOMINGOS SAVIO EVANGELIZADOR HO HAHALOK

Domingos Savio Santu ho hahalok, nia lahanorin deit nia maluk sira atu hala'o maibe nia rasik fo ezemplu. Bele dehan katak, ninia moris mak liafuan diak moris nian, hanesan Saun Tiago hateten iha nia surat: "maun-alin sira, manan saida, bainhira ema ida dehan katak nia iha fiar, maibe laiha hahalok? Nia fiar ne'e bele so'i nia? Ne'eduni, fiar mesak deit, wainhira hahalok la iha, fiar ne'e mate. Maibe ema ida dehan karik, "O iha fiar no hau iha hahalok." hatudu O nia fiar nebe hahalok laiha, no hau sei hatudu hau nia fiar ho hau nia hahalok, (Tg, 2:17-18). Iha oratório Valdoco Don Bosco deskobre katak Domingos Savio iha virtude estraor-

dináriu, caridade bo'ot liu ba ninia maluk sira, hanesan nia halo ba Maromak. Ninia maluk sira mós sente katak, domingos Savio kolega ida sepesial, wainhira kolega ida moras, hot-hotu ba buka nia hanesan sira nia esfermeiru, sira nebe neon-kraik, laran susar, buka nia atu konsola sira ho lia kmanek no hakmatek nian. Nia rasik hateten “hau la merese iha Maromak Futar-Oin, wainhira hau tau matan ba ema moras ka ba vizita sira, hau la halo deit tan hau gosta, maibé hau hetan duni ksolok hodi hala'o buat hirak ne'e”. wainhira nia maluk ida lakohi hemu aimoruk tan moruk liu Domingos Savi hateten ba nian: “hau nia belun, ita sei hemu aimoruk nebe sira fo mai ita, halo nune'e ita bele halo tuir mós Na'i Maromak nia hakaran. Na'i fo mai ita doutór no aimoruk, tulun ita atu hetan isin diak; nune'e se lakohi hemu aimoruk karik ita sei la soi iha Maromak Futar-Oin. Ó hanoin katak aimruk uituan ne'e moruk hanesan na'an horun no tua sin nebe ema judeu sira fo ba ita nia Na'i Jesús Kristu iha krus?

Analiza istoria DS nian liu husi perguntas!

1. Isteria DS nian nebe ohin hau konta, hahalok ida nebe mak atrae liu imi?
2. Tamba sa mak imi (atrae liu ba DS nia hahalok ne'e)?
3. Imi (ó) hanoin saida ba imi nia moris depois ke imi rona istoria ne'e?

HAFORSA ISTORIA HO LEITURA HUSI : 1 PEDRO 1-25

Moris santu

¹³Ne'e duni, fo laran ba, keta lanu ba, tau imi nia esperansa tomak ba grasa nebe sei mosu ba imi wainhira Jesus Kristu *mosu mai*. ¹⁴Nudar oan diak, imi keta halo tuir hakarak aat sira nebe imi tuir wainhira imi sei beik, ¹⁵maibé, nudar Ida nebe bolu imi mak santu, imi mos haka'as an atu sai santu iha imi nia hahalok tomak; ¹⁶basa hakerek nanis ona, “Ema sei hanaran imi santu, basa Ha'u santu.” ¹⁷Imi bolu karik nudar Aman ida nebe tesi lia ba ema ida-ida tuir ida-ida nia hahalok, la fihir ema; imi book an ba ho laran tauk iha tempu tomak nebe imi la'o rai. ¹⁸Imi hatene katak Maromak sosa imi ona housi imi nia hahalok aat sira nebe imi simu housi imi nia bei-ala sira, la'os ho osan mutin eh osan mean nebe bele lakon, ¹⁹maibé ho Kristu futar ran, nebe folin boot duni: Kristu nudar bibi malae ida nebe la foer, la aat. ²⁰Maromak tau Nia molok mundu hahu, maibé fo hatene sai deit iha tempu nia rohan, ba imi nia diak. ²¹Housi Nia, imi la tauk hakbesik Maromak nebe halo Nia moris hi'as housi mate, no fo gloria ba Nia, atu imi tau imi nia fiar no esperansa iha Maromak. ²²Hamos

SETEMBRO 2014

tiha imi nia klamar housi imi nia moris tuir lialos; wainhira imi hadomi imi nia maluk, imi hadomi duni ba ho laran. ²³Imi moris fali ona, la'os housi musan nebe bele lakon, maibé housi ida nebe la lakon, hodi Maromak nia liafuan nebe moris no horik iha imi; ²⁴basa “Isin tomak hanesan du'ut, nia kmanek hotu hanesan du'ut nia funan. Du'ut namlaek, no nia funan monu, ²⁵maibé Maromak nia liafuan hela ba nafatin.” Ne'e mak liafuan diak nebe haklaken tiha ba imi.

PERGUNTAS

1. Tuir imi nia hanoin Moris Santu katak sa?
2. Tamba sa mak ita ema tenke sai santu?
3. Wainhira? No oins ita bele hatudu hahalok Santidade nian?
4.

SUMARIO

Santidade mak objetivu prinsipál iha ema sarani nia moris. Sarani ida-idak simu bolu atu sai santu hanesan Aman Maromak rasik hateten “Atu imi bele sai Santu, tamba Ha'u Santu” (Lv. 11: 44). Doben foinsa'e sira, ho mensajen no ejemplo Domingos Savio nian, fo hanoin fali mai ita oinsa ita bele hare ou avalia fali ita nia moris nudar ema sarani nebe hola parte ona ba Jesus Kristu Nia moris. Maske ita iha rajaun atu dehan katak ita ladun konsiente ba ita nia dever nudar ema sarani tamba karik ita sei ki'ik, ita nia inan aman lori ita lalais ba simu sakramentu batismu, nune'e wainhira ita bo'ot mai ita la tau valor ba sakramentu maibé hakarak ka lakohi ita hola parte ona. Nune'e ita buka atu haburas fali ou habo'ot fali ita nia fiar ba Maromak liu husi meus sira nebe mak oferese husi asaun saida deit, seidak tarde atu ita fila fali ba ita Aman Maromak. Los duni foinsa'e iha aspirasaun oi-oin hakarak koko buat hotu maibé keta haluha atu tau matan nafatin ba imi nia vida sarani nian. Aprende husi Domingos Savio nia ejemplo atu sai foinsa'e nebe moris iha valor atu sai mediator ka konsolador, atu bele fo sasin ba hahalok santu nian iha maluk sira seluk nebe mak nunka frekueta akvidades religiosas nian. Leitura konfirma liu tan ba Domingos Savio nia ejemplo katak maske ita ema sarani ona, ou bele dehan katak imi frekueta bei-beik iha actividades religiosas sira

nian iha ambiente kongregasaun ida nian maibé kuidado mós. Tamba imi maske frekuenta bei-beik aktidades sira hanesan ne'e maibé se karik imi la hatudu iha imi nia hahalok sira iha uma, iha sosiedade, ka iha nebe deit, imi ne'e lakon tempu deit, tuir aktidades sira ne'e. aktidades sira ne'e, sei la folin no lakon le'et deit. Domingos Savio la ba do'ok nia aplika iha oratorio hamutuk ho nian maluk sira. Hare ba katak ita nia amu Papa Fransisco, mós fo hanoin ba mundu tomak iha ninia Exortação Apostólica Gaudium “Evangeliu ksolok nian” konvida ema sarani sira atu sai husi sira nia moris be fasil ou hanoin-An nian ka hanoin-An deit, nune'e bele ba haklaken Jesus ba maun-alin sira seluk nebe mak seidauk hatene didiak Jesus Krsitu. Ne'e presiza mudansa kona ba An nebe nia hanaran “KONVERSAUN MISIONARIA”. Neduni doben foinsa'e sira keta tur bilan ka sai estrange iha imi nia moris ba lalaok santidade nian hodi preukupa deit ba sasan mundu nian deit maibé mai ita ba haklaken ita nia FIAR NO ITA NIA TESTEMUNHU KONA BA MAROMAK. Basa ita nia testimonho kona ba Maromak liu husi ita nia moris nudar sarani ida ne'e folin teb-tebes, iha Maromak futar oin (foinsa'e katolika diak no iha fiar bo'ot) ema ne'e halo relasaun klean ho Maromak ne'e mak importante teb-tebes ba nia.

Final:

Orasaun:

Proposito ruma mos bele depende ba animadores.

KANTA : FOINSA'E TIMOR OAN SIRA (HBN 259)

SETEMBRO 2014